

## Tak puas hati bil elektrik tinggi, fail tuntutan kepada TPPM

|| 16 Jun 2020



Gambar kecil: Rosol

AA

**PUTRAJAYA - [DIKEMAS KINI]** Pengguna yang tidak berpuas hati dengan bil elektrik yang melambung tinggi semasa Perintah Kawalan Pergerakan (PKP) boleh memfailkan tuntutan di Tribunal Tuntutan Pengguna Malaysia (TPPM).

Timbalan Menteri Perdagangan Dalam Negeri dan Hal Ehwal Pengguna, Datuk Rosol Wahid berkata, langkah itu adalah alternatif selain penyaluran aduan kepada Tenaga Nasional Berhad (TNB) dan Suruhanjaya Tenaga.

"Isu bil elektrik yang tinggi semasa PKP memang dalam perhatian kita. Kita sedar ramai yang meluahkan rasa tidak puas hati.

"Buka fail di TTPM dengan bayaran fi RM5 dan kes akan diadili sebaiknya," kata Rosol di sini hari ini.

Menurutnya, TTPM telah menerima dua tuntutan termasuk satu berkaitan kenaikan luar biasa bil elektrik yang difaiklan pada 5 Jun lepas.

Isu kenaikan bil elektrik hangat dibincangkan oleh rakyat khususnya menerusi media sosial, yang tidak berpuas hati dengan caj yang dikenakan kerana terlalu tinggi berbanding sebelumnya.

TTPM yang ditubuhkan pada 15 November 1999 menyediakan saluran alternatif kepada pengguna untuk membuat tuntutan ganti rugi berkenaan pembelian barang atau perkhidmatan dengan kes boleh diselesaikan kurang daripada 60 hari.

Badan itu juga membolehkan pengguna memfailkan tuntutan tebus rugi terhadap pembelian barang dan perkhidmatan yang tidak menepati apa yang diiklankan dengan amaun tidak lebih RM50,000. - Bernama

**Artikel Penuh : <https://www.sinarharian.com.my/article/88079/BERITA/Nasional/Tak-puas-hati-bil-elektrik-tinggi-fail-tuntutan-kepada-TTPM>**

© 2018 Hakcipta Terpelihara Kumpulan Karangkraf

